

## 每週經課朗誦經文(巴克禮台語漢字)2014/04/06

### 共同經課 - 1

#### 以西結書三十七章一節~十四節

1 耶和華的手下佇我的身上。耶和華用伊的神導我出去，下我佇山谷中；彼個山谷有骨頭滿滿。2 伊互我對骨頭的四圍經過，看啊，佇山谷的面上有骨頭真多，看啊，in 真枯焦。3 伊對我講：「人子啊，諸個骨會活袂？」我應講：「主耶和華啊，你知伊。」4 伊閣對我講：「你著對諸個骨宣傳來給 in 講：恁枯焦的骨啊，著聽耶和華的話。5 主耶和華給諸個骨按呢講：『看啊，我欲互活氣入恁的內面，恁就欲活。6 我欲互恁的頂面有筋，閣互恁有肉，閣用皮給恁包，用活氣入佇恁，恁就會活；恁就知我是耶和華。』」7 對按呢，我趁命令來宣傳。當我啲宣傳的時，有聲，忽然地動；諸個骨相連合，逐支歸伊的本位。8 我看伊，看見骨的頂面有筋，也有肉，閣有皮包佇伊的頂面，總是內面無活氣。9 伊就對我講：「你著向風來宣傳，人子啊，著宣傳來對風講，主耶和華按呢講：活氣啊，對許個風來，歎佇諸個受創者，互 in 會活。」10 對按呢，我照伊所命令我的來宣傳，活氣就來入佇 in，in 就活，起來倚，成做極大的軍隊。11 伊就給我講：「人子啊，諸個骨就是以色列的全家。看啊，in 講：『阮的骨攏枯焦，阮的向望攏失落，阮一盡剿滅。』」12 所以你著宣傳來對 in 講，主耶和華按呢講：『我的百姓啊，看啊，我欲開恁的墓，互恁對恁的墓起來，導恁入以色列地。13 我的百姓啊，我開恁的墓，互恁對恁的墓起來，恁就知我是耶和華。14 我欲將我的神下佇恁的內面，恁就欲活。我安置恁佇本所在，恁就知我一耶和華按呢講，也按呢成。這是耶和華講的。』」

### 共同經課 - 2

#### 詩篇一百三十篇

1 [上崎仔的詩。] 耶和華啊，我對深淵求叫你！2 主啊，求你聽我的聲！願你俯耳孔聽我懇求的聲！3 主——耶和華啊，你若究勘罪惡，是誰倚會住？4 總是你有赦免的恩，欲互人敬畏你。5 我聽候耶和華，我的心神聽候；佇伊的話我有向望。6 我的心神聽候主，比守更的人，聽候天光卡切，比守更的人，聽候天光卡切。7 以色列啊，你著向望耶和華！因為佇耶和華有慈愛，佇伊有豐盛的救贖。8 伊的確救贖以色列脫離伊一切的罪惡。

### 共同經課 - 3

#### 羅馬書八章六節~十一節

6 因為肉體的意向，是死；神的意向，是活閣平安。7 因為肉體的意向，是對敵上帝；因為伊無降服上帝的律法，也袂會降服，8 閣惦佇肉體的，袂會互上帝歡喜。9 獨獨上帝的神若倚起佇恁，就恁無惦佇肉體，是惦佇神。無有基督的神的，毋是伊的人。10 基督若惦佇恁，就恁的身軀因為罪死，神因為義活。11 獨獨互耶穌對死人中復活的，伊的神若倚起佇恁，就互基督耶穌對死人中復活的，也欲將伊的神就是倚起佇恁的，互恁會死的身軀復活。

### 共同經課 - 4

#### 約翰福音十一章一節~四十五節

1 有一人名拉撒路，破病，伊倚佇伯大尼，就是馬利亞及伊的姊妹馬大的鄉社。2 此個馬利亞就是曾用香油抹主，用伊的頭毛拭主的腳的；伊的兄弟拉撒路破病。3 in 二個姊妹就差人去尋耶穌，講：「主啊，你所疼的人破病啦。」4 耶穌聽見，就講：「此個病不致到死，就是為著上帝的榮光，互上帝的子對此個得著榮光。」5 今馬大及伊的姊妹及拉撒路，攏是耶穌所疼的人。6 既然聽見伊破病，就佇所住的所在猶原住二日。7 後來就給學生講：「咱閣來去猶太。」8 學生給伊講：「拉比，近來猶太人愛欲用石頭擲你，你猶欲閣去遐嗎？」9 耶穌應講：「一日豈無六時嗎？人若日時行，就袂觸著，因為看見此世間的光。10 總是人若暝時行，就觸著，因為內中無光。」11 講息，閣給 in 講：「咱的朋友拉撒路啲暈，我去是欲叫伊醒。」12 學生講：「主啊，伊若啲暈，就會好。」13 耶穌所講是指伊死，若是 in 掠準是指伊安眠啲暈。14 所以耶穌明明給 in 講：「拉撒路死啦。15 我亦為著恁歡喜，因為我無佇遐，是欲互恁信。總是咱來去就近伊。」16 多馬，稱低土馬的，就給同做學生的人講：「咱諸個亦來去及伊相同死。」17 耶穌到的時，拉撒路佇墓裡已經四日啦。18 伯大尼近耶路撒冷，相離約量五里。19 有猶太多人已經就近馬大、馬利亞，欲為著 in 的兄弟來安慰 in。20 馬大聽見耶穌來，就去接伊；馬利亞猶原坐佇厝內。21 馬大對耶穌講：「主啊，你若佇遮，我的兄弟就袂死。22 我今亦知，見若你對上帝求的，上帝欲互你。」23 耶穌給伊講：「你的兄弟欲復活。」24 馬大給伊講：「我知末日復活的時，伊欲復活。」25 耶穌給伊講：「復活及活命是在佇我。信我的人雖莽死，猶久欲活；26 見若活來信我的人永永袂死。你信此個嗎？」27 伊給伊講：「主啊，是啦，我已經信你是基督，上帝的子，就是來入世間的。」28 講息，就倒去暗靜叫伊的姊妹馬利亞，講：「先生來啦，啲叫你。」29 馬利亞聽見，緊緊起來，去就近伊。30 彼霎，耶穌猶未入鄉社，猶佇馬大接伊的所在。31 許個及馬利亞佇厝內啲安慰伊的猶太人，看見伊緊緊起來出去，就隨伊，拍算伊欲去墓裡啼哭。32 馬利亞到耶穌所佇的所在，看見伊，就仆佇伊的腳下，給伊講：「主啊，你若佇遮，我的兄弟就袂死。」33 耶穌看見伊啼哭，閣及伊相及來的猶太人亦啼哭，就真感心，34 閣大茹亂，講：「恁下伊佇甚麼所在？」in 就給伊講：「主啊，來去看。」35 耶穌流目屎。36 猶太人就講：「你看，伊疼此人到按呢。」37 其中有的講：「伊曾開晴暝人的目調，豈袂互此人無死嗎？」38 耶穌閣感心，到墓裡；彼個墓是石洞，有一塊石塞下啲。39 耶穌講：「徙開彼塊石。」死人的姊妹馬大給伊講：「主啊，今臭啦，已經死四日啦。」40 耶穌給伊講：「我豈無給你講，你若信，會看見上帝的榮光嗎？」41 in 就徙開彼塊石。耶穌抬日向天，講：「父啊，我感謝你，因為你已經聽我。42 我知你常常聽我，獨獨我講按呢是為著周圍啲倚的眾人，互 in 信你差我。」43 講息，就大聲喉叫講：「拉撒路出來！」44 死人就出來，手腳紮布，面包巾。耶穌給 in 講：「解開互伊行！」45 就近馬利亞的猶太人看見耶穌所行的代誌的，多多信伊；